

Tallimangornerup arfiningornerullu unnuaani kiisalu ullut freerfiusussat nallilerneranni ullaassakkut 05.00-p tungaanut imigassamik sassaaliisalnissaq anguniarlugu Imigassamut inatsimmi § 26-p allanngortinnissaanut siunnersuummik saqqummiusseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Justus Hansen, Demokraatit)

Aamma

**Uunga siunnersuut: Imigassaq pillugu Inatsisartut inatsisaata allanngortinneqarnera pillugu Inatsisartut inatsisaat nr. xx, xx. xxx 2019-imeersoq.
(Peqqissutsimut, Isumaginninnermut Inatsisinillu Atuutsitsinnermut Naalakkersuisoq)**

pillugit

Inuussutissarsiornermut Aatsitassanullu Ataatsimiititaliap

siunnersuutit aappassaaneerpeqarnerannut

ISUMALIUTISSIISSUTAA

Inuussutissarsiornermut Aatsitassanullu Ataatsimiititaliap suliarinninnermini ilaasortarai:
Inatsisartunut ilaasortaq, Henrik Fleischer, Siumut, Siulittaasoq
Inatsisartunut ilaasortaq, Múte Bourup Egede, Inuit Ataqatigiit, Siulittaasup tullia
Inatsisartunut ilaasortaq, Aqqalu Jerimiassen, Atassut
Inatsisartunut ilaasortaq, Hermann Berthelsen, Siumut
Inatsisartunut ilaasortaq, Randi Vestergaard Evaldsen, Demokraatit
Inatsisartunut ilaasortaq, Peter Olsen, Inuit Ataqatigiit
Inatsisartunut ilaasortaq, Tillie Martinussen, Suleqatigiissitsisut

1. Siunnersuutit imarisaat siunertaallu (imm. 57 aamma 209)

(Imm. 57) Tallimangornerit arfiningornerillu unnuakkuini nal. 5.00 tikillugu imigassamik sassaalliisoqarsinnaalernissaa siunnersuuteqartumit kissaatigineqarpoq. Tamatuma saniatigut unnuani aqaguani sulinngiffeqarfiusussani sassaalliisoqarsinnaalernissaa siunnersuuteqartumit kissaatigineqarpoq.

(Imm.209) Inatsisissatut siunnersuut Inatsisartut kissaateqarnerat tunngavigalugu Naalakkersuisunit saqqummiunneqarpoq. Inatsisissatut siunnersuut manna Inatsisartut

ukiaanerani ataatsimiinnermi aalajangiiffigisassatut siunnersuutinik sisamanik, ukuninnga UKA 2018/52, UKA 2018/53, UKA 2018/54 kiisalu UKA 2018/55-imik suliarinninnerminni akuersissuteqarnerisa kinguneraat.

1.1 (imm. 209) inatsisissatut siunnersuutip imarisai pingaarnertit

- Meeqqat inuusuttullu 18-it inorlugit ukiullit inersimasunik ingiallorteqaratik sassaalliisarfinniissinnaanerannik sivitsuineq. Manna tikillugu piffissaliunneqartoq nal. 20.00-iusimagaluarpoq, taanna nal. 23.00-imut sivitsorneqarpoq. Meeqqat inuusuttullu ingiallorteqaratik nal. 23.00-imut cafémiissinnaanissaat siunertaralugu aalajangiiffigisassatut siunnersuut saqqummiunneqarpoq.
- Inatsisartut akuersissutigisaat naapertorlugu pisiniarfiit imigassanik aalakoornartulinnik tuniniaasinnaanerannut piffissaliussat. Maannamiit ataasinnngornermit arfininngornermut tuniniaanermut piffissaliussaq tassaalerpoq nal. 10.00-imiit 20.00-imut.
- Aalakoornartortallit pillugit pilerisaaruteqarsinnaaneremut inerteqquteqarnerup atorunnaarsinneqarnera, tamanna pillugu aalajangersakkat inatsisissatut siunnersuutikkut matumuuna peerneqarput. Imigassanik aalakoornartortalinnik nittarsaassinermut maleruagassanut tunngatillugu tuniniaanissamik nittarsaassisarnermut inatsimmut innersuussisoqarpoq, matumani pingaartumik tuniniaanissamik nittarsaassinermi pitsaasumik ileqqoqarnissamut kiisalu meeqqanut aamma inuusuttunut saaffiginnittumik nittarsaassinermut maleruagassat innersuussutigineqarlutik.
- Imigassat aalakoornartortallit assiaqtsersorneqarnissaannik piumasaqaatip atuuttup atorunnaarsinneqarnera.
- Paasissutissanik ingerlatseqqissinnaaneremut tunngavissaq. Sassaalliisinnaaneremut politiit inerteqqusiisinnaanerannik Inatsisartut inatsisaanni § 32, imm 1 periarfissiivoq. Inatsisinik atuutsitsinissaq eqqarsaatigalugu inuit aalajangersimasut inerteqquteqarfigineqartut pillugit paasissutissanik politiit ingerlatseqqissinnaanerannik tunngavissamik ilanngussisoqarpoq.¹

¹ Ataatsimiititaliap paasinninnera malillugu politiitit kissaateqarnerup nassataanik aalajangersagaq taanna ilanngunneqarsimavoq. Inatsisissatut siunnersuummi aalajangersakkamik paasissutissat politiitit imerniartarfinni susassaqtunut tunniunneqartut nipangiusimaneqartussaanerannik qulakkeerisumik ilanngussisoqarpoq.

1.1.2 (imm. 209) Naalakkersuisunit allannguutissatut siunnersuut

- Naalakkersuisut inatsisissatut siunnersuummut matumunnga allannguutissatut siunnersuummik saqqummiussaqrput. Taamaalilluni § 27, imm. 3, aalajangiusimaneqarluni, tassami imigassanik ussigassanik akeqanngitsumik agguaa sinnaanerup inerteqqutaajunnaarnissaa, ussassaarisarnermik qasukkaanissaq imaluunniit atorunnaarsitsinissaq pillugu aalajangiiffigisassatut siunnersuuteqarnermi siunertaanngimmat. Taamaattumik siunnersuutigineqarpoq aalajangersakkap taassuma aalajangiusimaneqarnissaa, taamaalillutik § 27-imi immikkoortut sinneri atorunnaarsinneqassallutik.

1.2 Inatsisissatut siunnersuut pillugu tusarniaaneq (imm. 209)

Inatsisissatut siunnersuut piffissami 18.12.2018-imiit 21.01.2019-imut tusarniaassutigineqarsimavoq. Inatsisartut ilusiliinissamut piumasaqaataat naapertorlugu tusarniaanermut akissutit inatsisissatut siunnersuummut ilanngussatut ikkunneqarsimapput. Naalakkersuisut tusarniaanermut akissuteqarsimasut isummersuutaat isiginneriaasiilu kinaassusersiunngitsumik unneqqarissumillu ilanngutsissimagaat ataatsimiititaliaq isumaqarpoq. Tusarniaanerup ingerlanneqarsimanera pillugu allanik oqaaseqarnissaminut ataatsimiititaliaq tungavissaqarsorinngilaq.

2. Siunnersuutit Inatsisartuni siullermeerneqarnerat (imm. 57 aamma 209)

(Imm. 57) Siunnersuut Inatsisartuni ilaannakortumik taparserneqarpoq. Naalakkersuisut tungavissiissutit saqqummiunneqartut tungavigalugit siunnersuummut tapersiinnissaminut tungavissaqarsorinngillat. Tungavilersuutit Naalakkersuisunit saqqummiunneqartut ilagaat; sassaalliisarnermik sivitsuinerup inuit unnuakkut illoqarfimmi imertariaasiannik pitsaanerusumut allannguisinnaanera ilisimaqassuutsimik tungaveqarluni isumaliutigineqarsimannngitsutut nalilerneqarnera. Malittuanik oqallisiginninnermi siunnersuut pillugu isummat assigiinngitsorpassuupput.

(Imm. 209)

Inatsisissatut siunnersuutip imarisaasa amerlanersaat Inatsisartunit tungaviusumik taparserneqarput. Oqaluuserinninnermi siunnersuutip ataatsimiititaliamut sorlermut suliassanngorlugu innersuunneqartariaqarnera pillugu Inatsisartuni assigiinngitsunik kissaateqartoqarpoq. Siunnersuut inuussutissarsiornermut Aatsitassanullu Ataatsimiititaliamut suliassanngorlugu innersuunneqarpoq.

3. Imm. 57 aamma imm. 209 pillugit Sulisitsisunit (GE) sassartitaqarfigineqarneq

Sassartitaqarfigineqarnermut atatillugu ataatsimiititaliaq Sulisitsisunit allakkiamik tigusaqarpoq, taanna isumaliutissiissummut matumunnga ilanngussatut ilanngunneqarpoq. Tamatuma saniatigut ataatsimiititaliap tungavilersuutit Sulisitsisunit saqqummiunneqartut

naammaginartumik annertussusilerlugit isumaliutissiisummi immikkoortoq 4-p ataani ilanngussiffigissavai.

4. Ataatsimiititaliap siunnersuummik suliarinninnera (Imm. 57)

(Imm. 57) Aallarniutigalugu ataatsimiititaliap maluginiarpaa Naalackersuisut akissuteqaamminni allassimasut aalakoornartortalinnik sassaalliisarnerup sivitsorneqarnissaanut ilisimasaqassutsimik tunngaveqarluni tunngavilersuisoqarsorinangitsoq. Ataatsimiititaliaq paasissutissaateqanngilaq Naalackersuisut naliliinerannik tapersiinissamut akerliliinissamulluunniit tunngavissiisinnaasunik. KNR'illi nittartagaani 2016-imi allaaserisami allassimavoq, sassaalliisarfiit sivisunerusumik ammasalneri unnuakkut eqqissiviilliortoqartarneranut nangikkiartarnerillu amerlassusaannut pitsaasumik sunniuteqarsinnaasutut politiinit isigineqartoq², tamatuma kingorna taama isumaqarneq politiinit saqqummiunneqaqqippoq. Soorunami nalileeriaatsit taakku imminnut naapertuutivinngitsut qanoq ilumoortiginerannik ataatsimiititaliaq aalajangiisinnaanngilaq. Ataatsimiititaliamilli aallaavittut naatsorsuutigineqarpoq Kalaallit Nunaanni unnuakkut illoqarfimmi pissutsinik ajornartorsiutinillu misilittakkatigut politiit salleryaallutik ilisimasaqassasut.

Sulisitsisut sassartitaqarneranni imm. 57-imut tunngatillugu tunngavilersuutit siunnersuummut tunuliaqutaasut paasilluarneqarsinnaasut kattuffimmit oqaatigineqarpoq. Taamaattorli sassaalliisarnerup nal. 5.00-ip tungaanut sivitsorneqarsinnaaneranut tunngatillugu Sulisitsisut arlalinnik nangaanartoqartitsipput. Sulisitsisulli sassartitaqarnerminni atortussanilu ataatsimiititaliamut nassiussaminni sassaalliisinnaanerup nal. 3.00-imiit 4.00-imut nalunaaquttap akunneranik ataatsimik sivitsorneqarsinnaanera kattuffiup ajornartorsiutaasussatut takorluunngikkaa oqaatigaa.

Inuussutissarsiornermut aatsitassanullu Ataatsimiititaliamit allannguutissatut siunnersuut (imm. 57):

Inuussutissarsiortunit naaperiaatitut siunnersuut ataatsimiititaliamit taperserumaneqarpoq. Ammasarfinnik sivitsuineq ajornartorsiutitaqanngitsoq paasinarsissappat ammasarfiup nal 5.00-ip tungaanut sivitsoqqinneqarsinnaanera kingusinnerusukkut isumaliutigineqarsinnaavoq. Tamanna tunngavigalugu allannguutissatut siunnersuut una ataatsimiititaliamit isumaqatigiittumit saqqummiunneqarpoq:

Tallimanngornerup arfininngornerullu unnuaaani kiisalu ullut freerfiusussat nallilerneranni ullaassakkut 04.00-p tungaanut imigassamik sassaaliisalnissaq anguniarlugu Imigassamat inatsimmi § 26-p allanngortinnissaanut siunnersuummik

² <https://knr.gl/kl/nutaarsiassat/politiit-imerniartarfiit-ammanerusalerpata-eqqissisimanarnerulissaag>

saqqummiusseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.

4.2 Ataatsimiititaliap siunnersuummik suliarinninnera (imm. 209)

Ataatsimiititaliap imm. 209-mik siullermeerinninnermi maluginiarpaa, siunnersuutip Inuussutissarsiornermut Ataatsimiititaliamut kiisalu Ilaqutariinnermut Ataatsimiititaliamut suliaassanngorlugu innersuunneqarnissaa assigiinngitsunit kissaatigineqartoq. Inatsisartut suleriaasiat malillugu siunnersuutip ataatsimiititalianut assigiinngitsunut marlunnet suliaakkiissutigineqarsinnaanera ajornarpoq.

Siullermeerinninneq tunngavigalugu Inatsisartut aalajangiiffigisassatut siunnersuutini UKA 2018/52-imik, UKA 2018/53-mik, UKA 2018/54-imik kiisalu UKA 2018/55-imik suliarinninneranni amerlanerussuteqarluartunit naalakkersuinikut aalajangiisimaneq tunngavigalugu siunnersuutip matuma Naalakkersuisunit saqqummiunneqarsimanera eqqaasitsissutigissallugu ataatsimiititaliaq tunngavissaqarsoraa. Inatsisissatut siunnersuut Inatsisartunit kissaatigineqartut tunngavigalugit saqqummiunneqarmat siunnersuutip saqqummiunneqarnerani nalilersuinerit itinerusumik iserfigissallugit ataatsimiititaliaq tunngavissaqarsorinngilaq.

Taamaammat ataatsimiititaliaq aalajangiiffigisassatut siunnersuutit UKA18-imi siullermeerneqarneranni isummersuutitut nalilersuinerinnullu saqqummiunneqartunut innersuussissaaq. UKA18-imi siullermeerinninnermi Ilaqutariinnermut Peqqissutsimullu Ataatsimiititaliap aalajangiiffigisassatut siunnersuutitut oqaaseqaataanik Inuussutissarsiornermut Ataatsimiititaliap pissarsiniartariaqarnera ujartorneqarpoq.

Tamatuma kingorna UKA18-imi ataatsimiititaliap aalajangiuppaa Ilaqutariinnermut Peqqissutsimullu Ataatsimiititaliaq, Nuummi Kofoeds Skole, Imigassaq Ikiaroorartorlu Pillugit Siunnersuisoqatigiit kiisalu MIO tusarniaavigineqassasut. Ataatsimiititaliaq aamma siunnersuutini suliarinninnermini tusarniarneqartunit akissutisiani pillugit isumaliutissiissummini allaaserisaminut innersuussissaaq – matumani aamma Ilaqutariinnermut Peqqissutsimullu Ataatsimiititaliamit akissutisiaminut³.

Taamaammat ataatsimiititaliaq isumaqarpoq suliaassap immikkoortua taanna UKA18-imi naammassineqareersoq. Naalakkersuisut inatsisissatut siunnersuummik matuminnga saqqummiussinermikkut UKA18-imi Inatsisartunit suliaakkiissummik malinnipput.

³ https://ina.gl/dvd/EM2018//pdf/media/2537764/pkt52_53_54_55_em2018_alkohol_bet_2beh_med_bilag_da.pdf

4.2.3 Imigassat aalakoornartortallit malittarisassiuunneqarnerat pillugu nalinginnaasumik isumaliutit

Sulisitsisut ataatsimiititaliamut sassartitaqarnerannut atatillugu Imigassat aalakoornartortallit pillugit Inatsisartut inatsisaata suli naleqqussaqqittariaqarnera Sulisitsisunit oqaatigineqarpoq.

Akunnittarfiit Neriniartarfiillu il.il imigassanik aalakoornartulinnik niueruteqarnissamut, akuersissummik peqartunut atatillugu, aamma kissaatigineqarpoq taamaattut aamma piffissanut aaliangersimasunut akuersissummik pisinnaatitaalernissaat, tak. § 10, stk. 1, nr. 5, kiisalu stk. 2-4, soorlu katittoqarnernut, ukiunik 12,5-inik, 25-inik 50-inillu il.il, nalliuttorsiuteqarnernut aammalu Inatsisartut ataatsimiititaliaanik nerisitsinernut kiisalu siulersuisunik nerisitsinernut atatillugu. Immikkut pisunut akuersissutit taamaattut tunniunneqartassapput pisussani tallimanngonerunngitsuni, arfininngorerunngitsuni il.il pisussaattillugit ataasiartamik sassaalliuteqartoqarsinnaasunngorlugu ullaassakkut 04.00-ip tungaanut.

Akunnittarfiit neriniartarfiillu tallimanngornerni arfininngornernilu unnuakkut sassaalliisarnermik misilittagaqarnerisa ilimagisariaqarnera eqqarsaatigalugu akunnittarfiit neriniartarfiillu immikkut aaqjissuussinernut atatillugu sassaalliisinnaanermut akuersissutininik qinnuteqarsinnaannginnerat aallaavittut pisariaqaanngikkaluamik killilersuinerusorinarsinnaavoq. Akunnittarfiit neriniartarfiillu inatsit malillugu nalliuttorsiornernut atatillugu sassaalliisinnaanermik suli qinnuteqarsinnaannginnerisa qanoq naapertuutisiginera isumaliutigeqqullugu ataatsimiititaliap Naalakkersuisunut kaammattuutigissavaa.

5. Siunnersuutip aningaasaqarnikkut kingunissai (Imm. 57)

(Imm. 57) Inatsisartut suleriaasianni § 33, imm. 1, malillugu aalajangiiffigisassatut siunnersuutip piviusunngortinneqarnerani aningaasaqarnikkut allaffissornikkullu kingunissat siunnersuummut tunngavilersuutini allaaserineqarsimassapput. Siunnersuuteqartup tamanna naapertorlugu siunnersuutip aningaasaqarnikkut kingunissai nassuiaatigisimavai. Ataatsimiititaliaq naliliinermik taassuminnga assortuinissaminut tunngavissaqaanngilaq. Naalakkersuisut aamma tassunga tunngatillugu uparuaatissaqarsimannngitsut ataatsimiititaliamit maluginiarneqarpoq.

5.1 Aningaasaqarnikkut kingunissat (Imm. 209)

Naalakkersuisut ilusiliinissamut piumasaqaatit naapertorlugit siunnersuutip pisortanut, inuussutissarsiortunut namminersortunut innuttaasunullu aningaasaqarnikkut kingunissai

nassuiaatigisimavaat. Tamatumunnga oqaaseqaateqarnissaminut ataatsimiititaliaq tunngavissaqarsorinngilaq.

6. Ataatsimiititaliap inasuteqaatai

(Imm. 57)

Ataatsimiititaliap isumaqatigiittup Inuussutissarsiornermut aatsitassanullu

Ataatsimiititaliap **allannguutissatut siunnersuutaata akuersissutigineqarnissaa** inassutigaa

-oOo-

(Imm. 209)


Ataatsimiititaliami amerlanerussuteqartut Siumumeersut, Demokraatineersut,

Atassummeersut kiisalu Suleqatigiissitsisuneersut **Naalakkersuisut allannguutissatut siunnersuutaata akuersissutigineqarnissaa** inassutigaat.

Ataatsimiitaliap taama oqaaseqaateqarluni isumaliutissiisummilu allassimaneratut paasinnilluni siunnersuut aappasaaniigassanngortippaa.



Henrik Fleischer
Siulittaasoq



Hermann Berthelsen



Múte B. Egede
Siulittaasup tullia



Aqqalu Jerimiassen



Randi V. Evaldsen



Tillie Martinussen

Peter Olsen



Sulisitsisut

Grønlands Erhverv

Greenland Business Association

Jens Kreutzmannip Aqq. 3

Postboks 73

3900 Nuuk

www.ga.gl

Tlf. +299 32 15 00

Fax nr. +299 32 43 40

ga@ga.gl

GER: 25027248

Inatsisartut

Inussutiussarsiornermut Aatsitassalerinermullu ataatsimiititaliaq

Uunga.: David Jensen

Emailikkut uunga ingerlatitaaq dje@inatsisartut.gl.

Nuuk, ulloq 1. maj 2019

Brev nr. D19-5246

Sagsnr. S19-020

Akunnittarfiit Neriniartarfiillu brancheudvalgianit Imigassanut
Aalakoornartulinnut Inatsimmi allannguutissatut imaattut kissaatigivaat

Helge Tang-ilu marluulluta Inuussutissarsiornermut Aatsitassalerinermullu Ataatsimiititaliamut sassarnitsinnut atatillugu matumani branchep maanna inatsisaasumut (imigassanut aalakoornartulinnut inatsit) atatillugu allannguutissatut siunnersuutai imaattut erseqqissaateqarfigaakka:

- Imigassanut aalakoornartulinnut Imigassanut Aalakoornartulinnut Inatsimmi § 26, stk. 1, nr. 2-mut atatillugu sassaalliteqarsinnaanermut piffissaliussaq nal. 12.00-imiit nal. 03.00- mut inissineqarsimasoq sivitsorumaneqarpoq ingerlasussanngorlugu nal. 12.00-imiit nal. 04.00-mut.
- Akunnittarfiit Neriniartarfiillu il.il imigassanik aalakoornartulinnik niueruteqarnissamut, akuersissummik peqartunut atatillugu, aamma kissaatigineqarpoq taamaattut aamma piffissanut aaliangersimasunut akuersissummik pisinnaatitaalernissaat, tak. § 10, stk. 1, nr. 5, kiisalu stk. 2-4, soorlu katittoqarnernut, ukiunik 12,5-inik, 25-inik 50-inillu il.il, nalliuttorsiteqarnernut aammalu Inatsisartut ataatsimiititaliaanik nerisitsinernut kiisalu siulersuisunik nerisitsinernut atatillugu. Immikkut pisunut akuersissutit taamaattut tunniunneqartassapput pisussani tallimangonerunngitsuni, arfininngonerunngitsuni il.il pisussaatillugit ataasiartamik sassaalliteqartoqarsinnaasunngorlugu ullaassakkut 04.00-ip tungaanut.
- Akunnittarfiit neriniartarfiillu il.il ullut Sisamangonersuaq, Tussiarfik, Qilaliarfillu sioqqullugit ammasinnaanermik imigassanillu aalakoornartunik akulinnik sassaalliteqarsinnaanissamut akuerineqassapput, tak. Imigassanut aalakoornartulinnut Inatsimmi § 26, stk. 3.

Inussiarnersumik inuulluaqqusillunga

Lars Krogsgaard-Jensen
Inatsisartut siunnersorti